

*Ad Mehemeth agà, sanzacho de Mostar.*

Per la cason de questo comandamento, al presente, da parte de la Signoria de Venetia è venuto a la mia honorata Porta lo ambassator suo, et ne ha fatto intender, da poi facta la pace, esser stà prese molte anime nei lochi spectanti a la Signoria de Venetia. Et per questa cason ho comandà per el mio comandamento, che andando un homo de la signoria de Venetia, in questo caso tu fazi come è conveniente, et ben vederai, et examinerai se cussi è, come ne ha referito el ditto ambassator. Se alcun del tuo sanzachato, da poi terminà la pace, fusse andà nel paese de la Signoria de Venetia et havesse tolto alcun suo subdito, quello troverai et liberarai da le lor man, et se alcun dei ditti fusse factu musulman, lo lasserai in sua libertà; quelli veramente stesseno ne la lor fede, darai ne le man de l' homo de la Signoria de Venetia, che possino andar nel suo paese; et se i ditti subditi presi in tempo de paxe non li restituirai a l' homo de la Signoria, non serai punito solamente con tuorte el sanzachato: et cussi sapi.

*A Schander bassà, sanzacho de Bossina.*

Per cason de questo comandamento, al presente, per parte de la Signoria de Venetia, el suo ambassator è venuto a la mia honorata Porta, et me ha dicto, da poi conclusa la pace, ne li paesi spectanti a la Signoria de Venetia esser stà tolte molte anime. Et per questa cason ho comandato, con el mio comandamento, che andando da parte de la Signoria un suo homo, da poi ch' è stà terminà la pace, tu debi examinar et veder si ne li lochi spectanti a la Signoria di Venetia è stà preso alcun suo subdito, et cercharai et li farai retener. Et quelli son facti musulmani libererai adzò vadino dove li ditarà la lor voluntà; quelli veramente che sono ne la lor fede, darai in le man de quello anderà per parte de la Signoria, sichè vadino nel suo paese. Me confido ne la tua conscientia che tu non farai, nè permeterai sia factu contra la pace et el sacramento, perchè in questo ne ho bona voluntà; nè anche ti contraverai in alcuna cossa. Questo sia per tuo avviso.

El zonzer nostro qui a Costantinopoli, fu a di 9 del mese de lujo *proxime* passato, *cum* le do galie sotil, sopra una de le qual era Ali bei ambassator, *sive* messo de lo excellentissimo Signor turcho,

stato li a Venetia, et sopra l' altra el magnifico et clarissimo ambassator de la illustrissima Signoria domino Andrea Gritti, come è noto alla magnificentia vostra.

Aproximati a la terra, ne concorse numerosissimo populo de diverse natione, merchadanti et altri, per veder la magnificentia sua, essendo quella da ognuno amata et reverita per le optime sue condition, cognossute nel tempo lui era merchadante qui in Pera. La quale, messo schala, et venuti li magnifici Alofazi et Zausbassi del Signor, *cum* circa 100 cavali, mandoli per la persona sua un cavalo de esso Signor, che non è de costume, desmontato de galia, fu acompagnato dai dicti a la casa soleva star li bayli. La excellentia del prefato Signor quella sera li mandò a presentar alcune cosse comestibile, *ut moris est, et similiter* fece el magnifico Achmat bassà Chercegogli, primo visir da la Porta. Facte el giorno adriedo le visitation a tuti tre li magnifici bassà et el beglarbey de la Gretia, che al presente se atrova de qui, *cum* li presenti a zescadun distribuiti, fu statuto el giorno, che fu la domenega sequente, zorno de Porta, per la audientia del Signor. Li zorni de Porta sono: sabado, domenega, luni et marti, che li bassà se conferiscono a la Porta per dar audientia et atrovare *cum* el Signor, et per introdurre *etiam* li ambassatori da la excellentia sua. El giorno suprascrito, juxta l' ordine, a la prima hora de zorno veneno a casa li do magnifici agà sopradicti per acompagnare et honorare el clarissimo ambassator; et gionti al seraglio, dove sono le habitation et zardini del Signor, che non men de 3 milia *cum* le sue mure circunda d' intorno el sito suo, e ne lo angulo de la cità se extende al mare, sopra el qual vien esser due parte d' esso seraglio, et la terza verso la terra. Per la porta principale di marmori facta, dove stanno da 10 turchi, intramo in una corte *meo juditio* longa come la piazza de San Marco, ne la qual star suoleno i zorni de Porta da 400 in 500 cavalli ad expetar li magnifici bassà, agà et altri suo patroni. In capo de dicta corte, desmontato el prefato magnifico ambassator da cavalo, fo conducto in un' altra corte non molto menor, ma de più bella forma et quadrangulare. Da la banda destra dal capo di la corte predicta apresso la porta se intra, senta lo agà di janizari soto un portego *cum* li suo jacobassi *sive* comestabeli, et li janizari, che erano circa 3000, uno apresso l' altro et una filza da pò l' altra; stavano in piedi per tuto el dicto ladi destro fino a l' altro capo; cossa certo bellissima et molta superba da veder. Da la banda senextra,